

**Ubutumwa Yezu Kristu yampaye bwo kugeza ku basenga bose tariki ya 8/3/2021 saa cyenda na mirongo ine n'itanu z'ijoro iwe - Rue Juliette Whytsman, 4 - 1050 Ixelles.**

**Yezu :** Nyiramukiza mwana wanjye nkunda, ntega amatwi nkubwire ikinzanye kuko ndababaye cyane, mwana wanjye.

**Valentine :** Karame Papa, ndi hano ndi igikoresho cyawe, nguteze amatwi ngo umbwire ikikuzanye kandi kikubabaje n'ubwo binteye ubwoba cyane.

**Yezu :** Humura, mwana wanjye, wihungabana. Ikinzanye cya mbere nk'uko buri gihe kuri iyi tariki ya munani z'ukwa gatatu nza buri mwaka mu gisibo kugusura kugirango nkubwire ibyerekeranye no gutangira gusiba.

Iki gisibo rero uzagikora bisanzwe nk'abandi bose, mbese ntabwo uzasiba nk'uko wabikoraga umara iminsi cumi n'ibiri utarya utanywa.

Uzagikora uko wagikoze umwaka ushize kuko ufite byinshi bikubabaza, bizakubabaza cyane muri kino gihe, ibitotezo bitandukanye bizaturuka impande zose uzira ubutumwa ngutuma burimo ukuri, guhongerera mu buryo butandukanye ngo umfashe gukiza isi. Uti gute ?

Ubutumwa twaguhaye, Njyewe na Mama Bikira Mariya, ubutumwa utaratanga, igihe kirageze kuko igihe cyo kumenya ukuri ni iki.

Uzabizira, ubitoterezwe, ni cyo nagutoreye, ndakurinda ngo uzavuge ukuri. Uhumure turi kumwe.

No gufasha abandi gusenga kurushaho birakenewe cyane bisaba kwitanga no kwiyibagirwa.

Ni musenge cyane kuko ibihe biragenda birushaho kuba bibi. Abantu benshi barababaye cyane.

Ni musenge mu shishikaye kuko abantu bafite byinshi ku mitima yabo: inzara, ubukene, ishyari, urwango no kwangana, gutotezanya, kubeshya no kubeshyera abandi, kwikuza, ubwicanyi bukabije kandi bunyuranye.

Burya nta kintu kibabaza nko kwicisha umuntu ururimi uvuga amagambo umubeshyera akiriho, muri kumwe, umutoteza nta mpamvu, ni byo byakubayeho bikubaho bakubeshyera, n'abandi n'abandi, mwana wanjye.

Mwe musenga, musabire Kiliziya Gatorika n'abihayimana bose kugirango bayoborane urumuri rwa Roho Mutagatifu bave mu mwijima w'ubuyobe bafashe abakristu gusenga no gusobanukirwa n'ukuri nyakuri mu rukundo no mu butabera barenganure abarengana, babavugira, babasura, babakomeza.

Musabire abihayimana batotezwa n'ababakuriye babategeka na bagenzi babo babana nabo.

Musabire abakristu batotezwa na Kiliziya zabo bazira ko basenga bavugisha ukuri badashaka ko gusohoka.

Abavuga Rozari nka we, n'abandi muyihuriyeho mwese, bana banjye, muyikomeze kuko ihumura imitima ikabona ukuri ku babishaka.

Ni na yo yirukana amashitani agasakuza impande zose mugatotezwa ngo mucike intenge muyihagarike. Uwo mutego muzawutegure turi kumwe ntihagire ikibakanga. Abihayimana nta mwanya bakigira wo gusenga na rozali bayihuruka kera kuko barangariye mu by'isi no kugira ubwoba kuri bamwe na bamwe bakorera ijisho.

Musabire abategetsi b'ibihugu muvukamo, mucumbitsemo kugirango bategekane urukundo n'ubutabera k'ubo bashinzwe kuyobora.

Musabire impfubyi zose aho ziva zikagera.

Musabire abapfakazi b'ingeri zose aho bava bakagera.

Komeza ufashe abandi, cyane cyane ababyeyi bakuze ubarinde kwiheba no kuba bonyine mu mazu yabo.

Ndashimira isengesho ryanyu mumaze igihe muvuga buri muni kuva kino cyorezo cyatangira, ryafashije benshi na n'ubu. Hari abari batangiye kugwa mu ntege nkeya barabyuka, hari abagenderaga ku magambo y'ibinyoma babwirwa bakabyemera na bo isengesho ryarabakanguye rirabafasha bibonera ukuri ku giti cyabo. Hari benshi bari barwaye barikiriramo mu buryo bunyuranye n'indwara zinyuranye. Mwirinde ubasenya atabubaka n'ubasenyerera atabubakira, utaguha icyo kurya washonje, ntakuvuze warembye, ntagusure wafuzwe, ntagusure ngo aguhumurize wagize ibyago akumariye iki mu byo akubwira bindi ?

Rozari rero yakoze byinshi bikomeye mwe muyivuga mutabonesha amaso yanyu kuko yagabanije ubukana bw' ibibi byari byugarije isi n'ibihugu byose.

Ni byo byari binzanye, mwana wanjye.

Ngaho vuga aya masengesho nguhe umugisha.

**Valentine** : Isengesho ryo gusabira abarwayi ...,

Isengesho ryo gusabira abatwanga...,

Dawe uri mw'ijuru...,

Ndakuramutsa Mariya...,

Hubahwe Imana Data...

**Yezu** : Nguhaye umugisha, mwana wanjye, « kw'izina ry'Imana Data na Mwana na Roho Mutagatifu, Amina ». Wirirwe, mwana wanjye.

**Valentine** : Urakoze cyane, Papa. Wiriwe. : Urakoze cyane, Papa. Uramuke.